

Thursday, October 9, 2025

Time - 2:30pm - 2:35pm

AKASHVANI AIZAWL

REGIONAL NEWS UNIT

TRAVEL FEST : CM

Chief Minister Pu Lalduhoma'n Ministry of Home Affairs-in ram dang atanga lo zin, foreign tourist te tan bika permit a pek, restricted area permit leh protected area permit chu khualzin ten awlsam zawka an hmuh zung zung theih nan hma an la mek tih a sawi.

He thu hi vawiina Mizoram Travel Fest 2025 ni 2-na Aijal Club-a neih a hmanpui na ah sawiin Pu Lalduhoma chuan ram dang nena irina, international border hmuh ve hrim hrim chak mi tam tak an awm avangin a ti a, Ministry of Home Affairs-in ram dang atanga lo zin te tan bika permit a pek, Restricted Area Permit leh Protected Area Permit chu khualzin ten awlsam zawka an hmuh zung zung theih nan hma an la mek tih a sawi.

Chief Minister chuan Mizoramah khualzin tam zawk hip lut turin tan lak a ngaih thu sawiin hnamdang khualzin hrang hrangte khawsak pui thiam a tul thu a sawi a, Mizoramah tourism industry a thang chak hle tih sawiin, zo nun mawi, tlawmngaihna, rinawmna leh hawihawmna an chawisan zel chuan Mizoramin khualzin an la ngah zel dawn a ti a, khualzin hipna chu industry lian takah an la chhuah thei dawn a ti a. Mizorama khualzinte chu dan ang taka lo lut, an haw a hun a haw leh mai tur an nih avangin hlauh tur leh hmuhsit tur a ni lo a ti a, hnamdang khawsakpui thiam a ngai hle tih sawiin, Mizorama an cham chhunga sum leh pai an senral chu Mizo mipuite sum lakluhna a ni zel tawh a ti a, khawvel ram hrang hrangten khualzin ngah tura thapui an thawh laia lo hlauh chu thil dik a ni lo tih sawiin, khualzin tam zawk hip luhna kawngah hmasawmna a awm theih nan, lirthei chuan man, ei leh in man, zanriah man leh thil dang man te chu to lutuka chhiar loh tur a ni a ti a, Aizawl khawpui chhunga taxi fare mumal lo lutuk te chu veiawm a tih thu sawiin, khualzin ten video-a engkim an lak thin avangin ei leh in thianghlim leh hrisel siam kawngah tan lak a ngai a ti bawk.

Chief Minister chuan Inner Line Permit (ILP) pawh changtlung lehzuala kalpui tum niin, tunah hian online kaltlanga tih theih turin an buaipui mek a, hemi hmang hian tutenge an ILP tawp tawh hnua Mizorama la awm tih te chu awlsam takin an hre zung zung thei tawh dawn tih sawiin Tourism sector-ah cheng nuai sing 3, sang 5, 798 man hu project hmuh tawh niin, thawh chhoh mek a ni a, an thawh zawh hunah chuan Mizoram tourism hmelhmang a tha zawngin a tidanglam dawrh dawn tih sawiin, Mizoram hmun hrang hranga hma an lak chhoh mek te a sawi a, sorkar laipua thuneitusangte an lo zin changin Mizoram chuan mikhual thlenna tur star hotel tha a neih loh avangin Chaltlanga Tourist Logde chu 5 star hotel a chantir turin hma an la mek a, outsource an tum dawn tih a sawi bawk.




MZP

Mizo Zirlai Pawl chuan Guwahati atanga Sairang Rel ticket a full reng laia, ILP pekchhuah tlem lutuk chu mak an tih thu sawiin, hei hian ILP neilo a bi bo tam tak an awm tih chiang takin a lantir niin an sawi.

He thu hi vawiina Aizawl Press Club-a thuhthar thehdarhtute an kawmnaah sawiin, MZP General Headquarters chuan nimin zinga Sairang Rel Station tlawhin Inner Line Permit (ILP) pek chhuah dan zirchiangin a hmunhma te an enfiah a, MZP chuan ngun taka an zirchian hnuah Sairang rel station chu station a nihna tur ang la nilo tih hre reng chungin Prime Minister chu hawn tir a ni an ti a, Mizoram sawrkar la inpeih loh zia pawh chiang takin an hmu tih sawiin, hengte avang hian Mizo mipui ten harsatna an tawk tan mek niin an sawi a. Rel Station hawn a nih tuk September ni 14, atanga October ni 7 thleng khan ILP hi 3,852 pekchhuah tawh a ni a, kutdawh thawn kir hi 6 an awm tawh tih an sawi a, Sairang rel station an tlawh lai pawhin ILP neilo a a ruka chhuah tum mi 30 vel lai an man chhuah thu an sawi bawk.

Byte : MZP President

MZP President chuan Bairabi leh Sairang inkar a station pathum : Hortoki, Kawnpui leh Mualkhang lamah pawh rel a tlan muang deuh a, mi tam tak an chhuk ni an hriat thu a sawi a, heng hmunah hian police duty awm ve mahse tam tak chu ILP neilo in an chhuah ngei an ring a ti a. Mizoram-a hnamdang lo lut te chu Tourist ang veka ILP pek an ni a, an lut lam chhinchhiah ni mahse an haw lam chiang taka chhinchhiah a nilo thung a, hei hian Mizoram-ah awlsam taka lut a, cham hlen ta tam tak an awm dawn tih a ti chiang hle tih sawiin Sairang rel station an zirchiannaah hian ILP check leh pe chhuaktu Mizoram Police duty an indaih lo hle a, ILP pekchhuah chu manual a tih vek a nih avangin, a la fel fai tawk lo hle a, CCTV engmah vuah a la awmlo a, Gate mumal tak siam a la nih loh bakah hungna a tha tawk lova, X-Ray Baggage Scanner khawl pawh hman theih a la ni lova, Mizoram chu dry state a nih angin, Excise & Narcotics duty dah an ni lo bawk a, Parking area a fel fai lo hle an ti a, Station a duty zawng zawngte chu training pek ni se an duh thu an sawi bawk a ni.



SMILE BEGGARY PROJECT

Social Welfare Minister Pi Lalrinpui'n chhan hrang hrang avanga hnam dang kutdawh lo lut danna tur leh, Mizorama kutdawhte chhawmdawla eizawna kawng dang buatsaihsak turin Mizoram sawrkarin theihtawp a chhuah tih a sawi.

Aizawl District huam chhunga chhan hrang hrang avanga midangte tanpuina dil thinte tana Sawrkar laipui scheme, Support for Marginalised Individuals for Livelihood and Enterprise (SMILE) project vawiina a hawna ah he thu hi sawiin Social Welfare & Tribal Affairs Minister Pi Lalrinpui chuan SMILE project kaihnhawihah Mizoram sawrkar chuan nasa taka hma la in kutdawh khapna dan hial alo siam tawh a ti a, chhan hrang hrang avanga hnamdang Mizorama kutdawh tura lo lut dan theihna dan tur anih thu sawiin Mizorama kutdawhte chhawmdawlina tur leh eizawna kawng dang buatsaihsak chu scheme in a tum ani tih a sawi.

Aizawl DC Pu Lalhriatpuia pawhin thusawiin, Aizawl chu Mizorama District thang chak ber leh a cheng mipuite pawh pun chak em emna a ni tih sawiin, hemi rual hian mi harsa leh chhumchhia zawkte, chung harsatna vanga kutdawhte pawh

an pung ve zel tih a sawi a. Chutiang mite chhawmdawlna tura Sawrkar laipuiin SMILE Scheme a duang chhuak chu Mizoram tan pawh hmasawna nasa tak a ni ngei dawn tih a sawi a ni.

Support for Marginalised Individuals for Livelihood and Enterprise (SMILE) project hi Sawrkar laipui chuan harsatna leh loh theih lohna avanga kutdawhte chhawmdawlna turin kum 2022 khan Ministry of Social Justice & Empowerment hnuaiah a kalpui tan a. Mizoramah chuan Aizawl District-ah hian kalpui hmasak ber tur niin, Aizawl Deputy Commissioner Office, Planning and Implementation Department chu implementing authority an ni a; Mission Foundation Movement (MFM) chu Scheme kaihnawih hma la tur an ni baw a. He project hian, loh theih lohna vanga kutdawn ten Central leh State Sawrkar hnuaia scheme hrang hrangte an chhawr tangkai theih nana hmalak te, zirna leh hriselna bakah eizawna kawng zawh thei tura thiamthil zirna an neih theihna tura hma lakte a huam dawn a, Vawiin vek hian Aizawl DC Office leh MFM-te hian he Scheme atana thawhona thuthlung (MOU) pawh an ziaik nghal a ni.



PM MODI & UK PM

Prime Minister Narendra Modi leh British Prime Minister Keir Starmer te chu vawiin khan Mumbai ah ram aiawh in an inbia a, India leh UK thawhdunna hrang hrang tih changtlun dan tur bakah insumdawntawna, ram venhim kawng ah te leh thil siamchhuah kawngah leh hmasawna tur hrang hrang an sawi dun.

Ram hruaitu pahnih te hi CEO Forum ah an tel dawn a, India leh UK thawhdunna tur kawng hrang hrang an sawi dawn a, hei bakah hian Mumbai a Global Fintech Fest vawi 6-na hmanpui in thu an sawi dawn baw.

Nimin lamah UK Prime Minister hian Mumbai ah thusawiin, sumdawna lam a hruaitute a kawm a, India leh UK insumdawntawna chu thil pawimawh tak anih thu sawiin, thilsiamchhuak tute nen pawh an inbiak thu a sawi baw.

